



Pengerusi Jawatankuasa Perumahan, Alam Sekitar, Perpaduan, Hal Ehwal Masyarakat Cina dan Siam negeri, Dr Robert Ling Kui Ee, (dua dari kiri) membuat tinjauan di lokasi tapak pelupusan sampah haram di Kawasan Industri Ringan Sungai Tukang, di sini. NSTP/NOR FARHANI CHE AD

Kedah cadang pindah kilang kitar semula plastik



Oleh Nor Farhani Che Ad
bhnews@bh.com.my

SUNGAI PETANI: Kerajaan negeri bercadang memindahkan kilang kitar semula plastik berlesen sekitar kawasan ini ke kawasan baharu di Bukit Selambau.

Pengerusi Jawatankuasa Perumahan, Alam Sekitar, Perpaduan, Hal Ehwal Masyarakat Cina dan Siam negeri, Dr Robert Ling Kui Ee, berkata perkara itu akan dibawa ke peringkat atasan.

"Sekiranya dipersetujui, kilang yang mempunyai lesen pada masa kini boleh memindahkan aktiviti mereka ke kawasan berkenaan.

"Namun, kilang terbabit perlu memenuhi kriteria seperti pematuhan 18 syarat dari Kementerian Perumahan dan Kerajaan Tempatan, pihak berkuasa tempatan dan lain-lain termasuk Jabatan Alam Sekitar (JAS)," katanya dalam kenyataan hari ini.

Sebelum ini, kilang kitar semula plastik di sekitar bandar ini didakwa mengeluarkan asap busuk sehingga berisiko menjejaskan kesihatan penduduk setempat.

Kilang terbabit juga dikatakan menjadi penyumbang wujudnya tapak pelupusan sampah haram yang menjadi lokasi pembuangan sisa kilang di sekitar daerah Kuala Muda.

Dr Robert berkata, sehingga kini hanya terdapat empat kilang mempunyai lesen operasi daripada pihak berkuasa tempatan.

"Sebelum ini kita mengesan terdapat 14 kilang yang tidak mempunyai lesen, bagaimanapun, tujuh daripadanya sudah diarahkan tutup.

"Kita juga bersetuju menyemak semula undang-undang berkaitan di peringkat negeri bagi mengawal sebaik mungkin aktiviti kilang kitar semula plastik di negeri ini," katanya.